

Minister dr. Alex Schwengle y Xander Bogaerts a haci desvelo

San Nicolas awor conoce veld 'Xander Bogaerts Centro di Bario Lago Heights'

Un momento historico pa mundo di deporte

DIADOMINGO mainta un multitud grandi di fanatico di baseball como tambe di nos orguyo nacional, Xander Bogaerts, tabata presente na e veld di Centro di Bario Lago Heights, pa disfruta di un 'Family Fun Day with Xander Bogaerts', unda cu a haci apertura oficial di e veld di baseball aki. E mainta deportivo aki a duna inicio oficial den compania di Minister di Salubridad Publico, Deporte y Cuido di nos Grandinan, dr. Alex Schwengle, cu tambe tabata presente pa hunto cu Xander Bogaerts haci e desvelo oficial di e nomber nobo di e veld aki.

"Esaki sigur ta un dia hopi bunita pa wak y bib'e hunto cu e comunidad di San Nicolas, specialmente nos muchanan di e deporte di baseball. E Gobierno aki a priminti cu poco poco e lo traha pa renoba e barionan di Aruba, specialmente pa loke ta trata di infraestructura di deporte den bario y awe nos tin e grato honor y placer pa mira e veld aki, cu a haya e nomber di Xander Bogaerts



Centro di Bario Lago Heights, demostrando nos orguyo y admiracion pa e logro di e hoben basebolista aki. E honor aki pa Xander, ta un bunita iniciativa di e directiva di Centro di Bario Lago Heights, ya cu Xander ta biba na San Nicolas y ta forma

parti di e comunidad aki," asina e mandatario a expresa durante e gran apertura.

Xander a duna di conoce tambe, cu ya e momento pa cuminsa train y focus riba baseball a yega. Su trainingnan na gym

a inicia y despues e lo cuminsa train e parti di baseball mes. Por a mira un alegria enorme riba su cara, ora el a mira tur e muchanan den oranan trempan di mainta na veld, como tambe e alegria y honor di por mira un veld, unda e como mucha tam-

be a hunga, carga su nomber.

E mandatario a sigura cu Xander sigur ta un fuente di inspiracion pa nos hobennan y nos chikito nan, specialmente den e deporte di baseball, ya cu nan tambe kier yega mes leu cu Xander y hunga den Serie di Liga Mayor Mundial.

Durante e mainta protocolario di desvelo di e nomber di e veld aki, tabatin varios persona presente y entre nan, Michael Benevenia, di New Jersey, un turista cu ta bishita Aruba ya pa 25 aña caba y cu tambe a dicidi di bin y disfruta di e dia cu Xander Bogaerts, door cu el a les'e den corant y ta un fiel fanatico di Red Sox.

Un representante di e deporte di baseball den region tambe tabata presente y a duna di conoce cu tin intencion pa analisa e posibilidad di trece torneo internacional di baseball na Aruba. Un ambiente masha dushi tabata reina y Le Groove, Tsunami, OREO y Mike's Disco a percura pa tur hende gosa sin fin di e dia aki hunto cu Xander Bogaerts y comunidad di Lago Heights.